

խարդ: Եւ կալեալ զթագաւորն եղին ի բանտի, և խընդրեցին զաւագ որդին՝ և նստուցին զնա յաթոռ թագաւորութեան հօր իւրոյ(*): Յայնժամ և մունետիկն աղաղակէր յամենայն քաղաքս սակս թագաւորութեան նոր թագաւորին սուլթան Մէհմէտի, որ էր ժամն ինչն երորդ:

Եւ յաւուրս մետասան թողին զթագաւորն ի բանտի. լայր դռնապէս, ոչ ուտէր և ոչ ըմպէր, աղաղակէր և զոռայր օրպէս զանասուն, հառաչէր և պառաչէր անդադար, խնդրէր հնար գտանել յարգելական տեղացն ելանել և ոչ կարէր:

Եւ յՕգոստոսի Ը յաւուր Գշի առեալ ընդ իւրեանս զՂարայ Ալի դահիճն եւ վաղվաղակի ընթացան ի բանտն, և մարտեաւ դահիճն և իրրեւ ոչ կարէր յաղթել, յերանացն բուռն հարեալ և ձմլեալ նվաղեցոյց ընկեցեալ ի գետնի և այսպէս դառն և սաստիկ մահուամբ խեղդամահ լեալ սպանաւ: Եւ բարձին զղի թագաւորին ի վերայ գլխոց իւրեանց և թաղեցին զնա մերձ առ հարս իւր: Եւ մահ թագաւորին եղև խորհըրդեամբ մուհտուն և վէզիւրին և զօրագլխաց եէնկիչէրուն և ոչ թելադրութեամբ առ հասարակ սպահուն, այլ սակաւուն: Վասն որոյ ծրարեալ նախանձ ի սիրտս նոցա յայնմ օրէ և մախային ընդ միմեանս և եղեն զօրքն յերկուս գունդս, առանձին սպահին, առանձին և եէնկիչէրին: Իսկ սպահին առիթ եղեալ զայն իր, աղաղակէին բացայայտ լինել մահապարտք թագաւորին: Եւ միւս դասուն պետք և զօրագլուխք անքանակ փութացան համոզել առ ի խաղաղութիւն, այլ նոքա ոչ լրեալ զնոյն բողոքէին պարտաւորել զնոսա, մինչ զի յաճախէր խռովութիւնք նոցա օր

(*) Լուս. օտար գրէ. Դ. Սուլ. Մեհմմետ յամի Տեառն 1648: